

TUMMERMANS-AUG...

Eine tummerman oppe Isidoorstraot is naeve zien vak auch druk doondje met ut good verzurde van zien gezin. Zoea zurgtj hae det der altied get te aete oppe taofel steit. Det wiltj neet zegge det hae de taofel dektj of steit te kaoke (alhoewel hae waal kerdjuus good en gaer kan barbekjoewe). Nae, hae is zoea begaon met de voeding en gezondjheid van zien gezin, det hae dervan euvertuugdj waas det onbespaote grundje oet eige haof toch waal ut allerbeste en allerlekkerste waas.

Dus hae fispernuldje zich eine boetegewoene mooshaof inein en poodje dao get mueërkes, slaaj, redieskes, aerdbieëre en ein erpel-plentje. Eedere daag ging der met zien jong kieke of ut waal good gegruidj waas en as der water nuëdig waas, waerdje der gesproeid. Stong der drek, waerde der gesjoeffeldj en as ut te weust waerdje, den kwoom de snui-sjieër der aan te pas.

Met op eine sjoene zunigj murge, wiedz hae met de wichter weer vol gooje mood ging kieke wie hel alles toch waal weer neet gegruidj zoj zeen, kreeg der biejnao ein hertverzakking. Midde in ziene sjoene mmoshaof, dao waas eine pronte berg zwarte aerd gegruidj. Hae haaj eine mol in ziene mooshaof.

Lieëlik kwaod om zoeaveul inbreuk op ziene praivissie en aanslaag op ziene veurraad aete, ging der nao ut bieëstje op jacht. Nao ein paar daag haaj der de voellak te pakke.

Dae tummerman haet nog lang gegruidj wie ut toch kan det dae mol noe net in ziene mooshaof van tweeë veerkantje maeter is belandj, as det det bieëstje hectares vol graas, venkel, asperjes en rabarber haet om zich eine bultj (of mieër) in te grave.

Wae vanne redaksie vinje det det bieëstje ein echt tummermans-aug mot hubbe gehadj om net in dae kleine mooshaof terecht te kinne komen. Wae vinje ut den auch raar det dae tummerman det neet haet weite te waardere.

AOLIE...



Hubtj gae ut auch gezeen. Op ut inj vanne Pinxtestraot haet ein stuk grondj te kaup gelaage. Nog neet ein klein bietje; nae ruum drie hectaar. Wae vanne Rabbedebbe haaje ut plan opgevattj op dae plak te kaup. Ut zoj kinne deene as evenementen-terrein. Plek zat veur de boetsautekes met de kermis, de Sintemertehaup doeanderbiej, de optocht get langer. Allemaal ideeje raosdje os door de kop. Oeteindelijk hubbe wae der mer van aaf gezeen omdet wae ut bij de bank neet rondj kreege (of der most aolie in de grond zitte).

Noe dinke wae waal det det zoj kinne, mer den is ut aafgelaupe aolie oet de tractor van Jos.

VREEMDJ...

Vanne redaksie van dees gezet kinse van alles zegge, mer neet det die verstandj hubbe van moderne kunst. Zoea haaje wae gesinjeleertj det der in de veurtuin van ein hoes oppe Speltjstraot ein roead bouwwerk waas geplaatst. Ut waas ein vreaemdj veurwerp, woeavan wae neet koste zeen waat ut waas. Ut leek in de verte nog waal uit meiste op zonne tillefooncel oet Ingelandj. Zoj ut den zeen det der get fout waas gegange met de aanleg vanne glaasvezel? Of waas Emiel missjens det oorelange gekwebbel van Jeanet aane tillefoon waal kotsmeug, en haaj hae der zoea minder last van?

Om der ut fiene van te weite haet ein van ooze reporters zich eine daag lang versjuuldj tusse de konifeere vlak achter det roeaje dink. Euverdaag haaj der get last van strontjvleege en taeye de aovendj van get mugge. Teruuk op kantoeear kos hae allein mer melje det ut leek of det der eemes nao binne ging. Soms huerdje ze wat zinge, soms get neurieje, soms get geklater en soms alsof der eine stein in de vierer gegoeadj waerdje.

Waat ut noe precies is, weite wae nog steeds neet. Mer os liektj ut waal good as Wim Coolen, dae dao auch dukker zien botterhamme zitj op te aete, ins geit kieke of der neet ein of angere aansloeting te make viltj nao de waeg. Want die strontjvleege zoote dao neet veur niks, dinke wae.

